



Senin, 26 Agustus 2024

Ogen: Efesus 5:22



“Patuh Man Perbulangen”



Senin, 26 Agustus tepetna hari ulang tahun Mamre se-GBKP. I bas HUT Mamre enda, tentuna pengarapenta selaku ndehara nandangi perbulangenta e me gelah Mamre selaku Bapa lebih mperdiateken jabu bage pe tetap njaga hubungan si harmonis kempak ndehara. Pengarapen enda me si jadi totonta selaku nande. Sura-sura dengen arapen e tentuna la banci jadi alu bage-bage saja tapi lit min perbahanen si mehuli i bas kita nari. Efesus 5:22 ngataken maka sekalak ndehara arus patuh man perbulangenna, bagi kepatuhen kempak Tuhan. Kata patuh (bhs Indonesia: tunduk – merendahkan diri), labo mesukah ngelakokensa, sabap patuh-tunduk ertina kita arus mpersilhang egonta bage pe gengsinta. Paulus ngataken man perpulungen Efesus gelah nggeluh i bas kerendahan hati-patuh sekalak nandangi sidebanna. Labo erkiteken kalak sidebanna ganjangen pangkatna, entah jabatenna asangken kita, entah pe kegeluhenna ulin asangken geluhta tapi erkiteken kepatuhenta nandangi Tuhan. Paulus muat contoh kepatuhen i bas konteks perjabun kerna erti merendahkan diri sekalak nandangi kalak sideban. Perjabun kalak Kristen lit i bas komitmen bage pe kewajiban. Sekalak ndehara arus patuh man perbulangen selaku imam tengah-tengah jabu, ertina sekalak ndehara arus nempatken dirina teruh kepemimpinan perbulangenna. Gambaren kepatuhen ndehara nandangi perbulangen e me gambaren kepatuhen perpulungen kempak Kristus. Gambaren kepemimpinan perbulangen nandangi ndehara e me gambaren keleng ate Kristus kempak perpulungen. Keleng ate si luar biasa, keleng ate si nggit ngasamken kesahna guna keselamatan perpulungen.

Patuh man perbulangen e perintah Tuhan man banta. Perintah enda tetap sidalanken gelahna kegeluhen perjabunta lit i bas dame, harmonis, dem keleng ate. Patuh man perbulangen e me caranta nuduhken ateta keleng kempak perbulangen.